

州乘一覽

地 220.129  
933

州乘一覽

薛鄂生

弁言

州乘一覽八卷。無作者姓氏。己卯秋南通文獻徵集會徵集地方文獻時所得之鈔本也。蠅頭小楷。極工整秀潤之能。顧亦無書者姓氏。然展讀一過。頗有轍跡可尋。按卷一原始有國朝雍正二年云云。則知其爲清人所著無疑。其卷八用物有云。庚寅仲夏通州牧沈公咸章延余入署中半月。查通庠題名錄。有清一代州牧之姓沈者。僅咸章一人。所謂庚寅乃乾隆三十五年。於是又知其爲乾隆時人。嗣檢崇川咫聞錄。有州乘一覽。汪芸巢著之語。按光緒通州志文苑傳。汪業字峙雲。幼即工吟。屢試被放。益肆力於詩。輪囷磅礴。凌紙怪發。中年浪跡江淮。所至倒屣投轄。聲噪一時。芸巢其別字也。又藝文志載詠蘭軒集。汪業撰。李琪爲敘。稱芸巢系出自皖。康熙間始遷通。而州乘一覽之名。州志徧檢不得。問諸地方長老。亦無知之者。然則舍崇川咫聞錄將無由證其姓氏矣。嗚呼。世變至此。故家巨族之藏書。毀於兵火者。何可勝計。而是書獨於斯時得之。庸非幸歟。會中諸君子集議。慮其散佚。將刊以永之。而屬弁言於余。周君星如并助余考證。因述其顛末。俾世之留心掌故者。有以覽觀焉。

中華民國二十九年三月盧國俊

州乘一覽卷一

原始



通州之始。古揚州之域。春秋屬吳。後屬楚。秦屬九江郡。漢書志臨淮郡海陵縣有狼山。後漢書志注扶海洲有蒹草。江南通志扶海洲通州地。是漢時爲扶海洲也。宋書晉安帝分廣陵立蒲濤。令揚州志蒲濤通州境。是晉時爲蒲濤也。通志又云。本唐鹽亭場。是唐時爲鹽亭也。南唐立靜海制置院。後周世宗顯德五年。陞靜海軍。頃之改通州。有狼山蔡港餘慶石港西塞五塞地。通州始此。宋政和七年。改靜海郡。天聖元年。改崇州。一曰崇川。尋仍爲通州。元至元十五年。改通州路。二十一年。仍爲州。立萬戶府於州治東。今狼山鎮總兵府是其地。國朝雍正二年。改直隸通州。秦興如皋海

門鄉隸焉。通州於顯德五年始築土城。周六里七十步。明年。蓋以陶甃。門有四。北門僻。多盜。置壯健營鎮之。及宋建隆三年。初設戍樓。南樓三層。城上有警鋪。政和中。塞北門。改營爲玄武廟。則僅有三門焉。甕城築於寶祐。吊橋設於明初。望江樓建於正德十二年。新城建於萬歷二十六年。新城以樓爲門。北接舊城。袤七百六十七丈。高一丈九尺。堦堦千六百七十堵。亭障九所。採劍山石代甃。康熙元年。伐軍山松樹千餘株。修之。今城南營坊西寺後兩處渡船口。是其水關遺跡。

秦興之始。漢元狩六年。置臨淮郡。統縣二十五。海陵縣有濟川鎮。南唐昇元初。陞濟川鎮爲秦興縣。縣治建於柴墟。縣城在今縣西北四十里。宋乾德中。徙治延令村。即今縣地。紹興間。築土城。今四門內大橋是其遺址。元

末爲張士誠所據。明太祖擊敗士誠於馬馱沙。有其地。嘉靖三十四年築城。周七里。計一千三百五十三丈。高二丈。堞五尺。面闊一丈。基一丈六尺。門五。水關一。濠深一丈。闊五丈。四十三年增重門於五門內。萬歷二十四年增敵臺四十一座。高二丈。闊半之。國朝雍正二年以縣屬通州。康熙二十五年建樓敵臺上。

如皋之始。春秋時吳鄆邑也。哀公十二年秋公會衛宋於此。杜元凱注云。發揚也。路史云海陵東南發絲口。後漢東陽縣地。東晉分廣陵爲五縣。置如皋縣。縣西一百五十步有如皋港。港側有如皋村。縣因名。隋開皇初併入江都郡寧海中。唐太和五年析爲如皋場。又曰如皋鎮。南唐昇元元年復爲縣。未有城也。宋慶歷中始建譙門。十三年始作六門。三十三年備倭患始築城。周七里。總一千二百九十六丈。高二丈五尺。面五尺。門樓四。水關二。濠深一丈。廣十五丈。袤三千三百六十丈。萬歷二十年築。月城二十七年築敵臺二十三座。國朝雍正二年屬通州。

海門鄉之始。僻居東筮。三代未有建置。古大安鎮地。即東洲也。原爲海嶼沙島。曾有布機流掛其上。沙漲爲陸。人民漸繁。又曰東布洲。崔東洲遷縣記云。後周顯德五年析通州地爲海門縣。轄地百有二十里。元至正中以江逼徙禮安鄉。明仍爲縣。正德中江逾逼。西徙餘中場。己亥颶濤溺民地。僅存十四里。徙通州東四十里。海門西三十里之金沙。國朝改隸揚州。附諸通。有地三十七里。成友謙文云海門一遷於禮安鄉。更遷於餘東。三遷於餘中。嘉靖三十四年地止剩十四里。割通州清幹鄉六里。金沙一里。仍


爲縣。按縣志輿圖。禮安鄉在舊河所港南。而起初之海門尙在廖角嘴南。廖角又在呂四南。徙金沙時。以倭患始築城。周五里三分。高二丈。堞高五尺。門四。上有戍樓窩舖。有水關。國朝康熙十一年。城圯於海。省入通州。曰海門鄉。甲寅州志云。海門昔日最爲險要。波濤泮泮。上匯江淮。下吞東溟。登城一眺。蒼茫萬里。收歸咫尺。惜乎桑田屢易。失此壯觀。

通州儒學考。王應鳳儒學志云。通之有學。志不載所始。陳堯重修儒學志。作於宋初。宋王隨學記云。先是立孔子像於城中西南隅。王應鳳志云。太平興國時也。乾興元年。徙東門內。創立大成殿。塑孔子容。洎曾閔而下。侍坐左右。後易木主。不知何年。又殿後構講堂。稽古閣。其即廟爲學。與大觀四年。植庠門。建射亭。改壯武營射堞。未幾燬於燹。紹興二年。草創於州治。

西置齋舍。二十三年。復創於治東舊址。淳熙七年。拓堂廡。淳祐間。又燬於兵。僅存禮殿。明倫堂。咸淳元年。重建齋廡牆垣。八年。重建學齋。元至正元年。重建大成殿。明正統九年。建兩廡。戟門。櫺星門。觀德亭。成化六年。重建明倫堂。祭器庫。置號舍。弘治中。易櫺星門。以石。構堂後軒。及學門。泮宮橋。十五年。闢射圃。正統九年。重建戟門。神厨。神鼎。及名宦鄉賢祠。嘉靖四年。重建三齋。九年。建尊經閣。增號舍。敬一亭。二十一年。建志道堂。三十二年。重建尊經閣。天啓七年。建鱣堂。修泮宮。龍翔鳳翥三坊。崇禎十一年。改魁星閣。治文津橋。餘小修不載。

市河考。陳大科市河記。通州始築城。卽有河。後夾河居民。實土拓地。架橋起屋。河日溢。萬歷四年。林登卿來守通州。訪悉利病。下令濬河。五閱月而

成。其橫自西水門入。而東亘州廨學宮前。析而東南出水門。其縱則兩支。一自玉帶橋注而南。匯於洗馬池。一由中正橋注而北。北則又分爲兩。一繞州廨後。匯於倉河。逆而西流。至王家壩。一繞學宮後。而東流。出水門。東西可並兩舟。縱而北可大舟。其南可小舟也。城中民運芻糧百貨不絕。如織。按王家壩東。昔爲大潭。逼育嬰堂後垣。其委直抱堂右。今大潭填塞。屋其上。僅存一水如帶。壩西大潭有水。循城根直南二十餘丈。今僅存潭水如勺。易於盈涸。而洗馬池亦填塞莫考。更數十年後。又不知若何矣。



州乘一覽卷二

山川

狼山。去州治南十八里。高五十丈。周五百一十二丈。昔白狼踞其上。僧伽驅之去。宋淳化間。邑令揚鈞上書改狼爲琅。以山多紫石也。米芾題爲第一山。登高遠眺。四野星羅。江光亘天。一瞬千里。朝旭靜照。水波不興。江南諸山。歷歷可數。而颶風忽簸。驚濤四起。遠峯近渚。咫尺相迷。蓋朝夕變態。千殊萬狀之大觀。盡於此矣。

禹王祠。在山腰官閣東南。小石塔西。所塑禹王像猶存。今訛爲靈官殿。相沿久之。無有辨者。

支雲塔。在山巔。凡五級。登之前望大江。倏忽萬狀。雲帆雪浪。四時改觀。南

望虞山。縹緲抹黛。福陶銅官諸峯。隱約吞吐。浮青偃翠。出沒有無。烟霞蒼茫之際。漁舟估舶。映帶日月。飛鳧翔鶴。遠勢盤空。而海門東去。浩淼奔騰。與天無際。覺濤風簸揚。欄楯中。雖蓬壺可借。鶴皆往也。方輿家謂郡之文筆。陸游老學菴筆記。宣和末。有巨商捨三萬緡。裝飾泗洲普照塔。煥然一新。建炎中。商歸湖南。至池州大江中。一日晨興。忽見一塔十三級。浮水上。南來。金碧照耀。而隨波傾颺。若欲倒者。商舉家及舟人俱見之。咸驚怖。誦佛。旣漸退。有僧出塔下。舉手揖曰。元來是裝塔施主船。淮南方大災。大師將塔往東海行化去。語未竟。忽大風作。塔去如飛。遂不見。未幾。聞塔燬於火。舒州僧廣勤與商船同行。親見之。今狼山支雲塔。建自太平興國間。而大聖香火始著。安知商舟所見者。非大師移塔於狼山乎。狼山在海上。其

語又合也。五山仙釋志。宋太平興國間。智幻禪師。臨沂人。姓田氏。早隸進士業。因讀楞嚴經有悟。薙髮爲僧。主狼山廣教禪院。乃造大聖塔。爲偈曰。當初不肯住長安。現相西歸泗水間。今日又還思展化。東來海上鎮狼山。衲子家知爲僧伽後身云。

萃景樓。在支雲塔前。景與塔同。宋初爲三會亭址。明嘉靖十八年。州同知舒纓。建是樓。玲瓏過迴。上逼雲衢。東顧巨海。南瞰長江。吳楚勝景。萃於欄楹間。纓自爲賦一記。

大觀臺。瑩石爲之。繚以石欄。縱橫十餘丈。方平高曠。登此四望無際。眉睫胸臆。俱爲之豁。東折爲振衣亭。又東爲山腰官閣。

山腰官閣。山東南半山上。昔爲半山亭。重葺改今額。上碧雲天半閣。左福州乘一覽 卷二 二 南通文獻徵集會印行

慧菴。

三辰軒。在山腰官閣上。明嘉靖間。州守董漢儒判官高節。郡人錢御史爍遊憇所。三人皆壬辰榜。故名。爍有記。後改葵竹山房。

半千石。半於姑蘇虎邱千人石也。在藏經樓東禪堂內。庭堦輪廣五十尺許。而石踞其半。上鐫半庭石三字。一名半千石。藏經樓後訛爲栖雲閣。按山東北麓葫蘆峯有千人洞。又天竺山有千人塋。望若不甚廣。可立千人。擬虎邱千人石。

飛來石。僅十尺。長如之。廣三之二。皴皴如鱗甲。如嵌碎石而成。相傳墮自山椒。在俯濤軒後。又天竺山亦有飛來石。色微黑。古苔斑剝。上銘三字。

松岡。在嶺上。有望海亭。自嶺至麓。蔽岡皆松。昔如皋季徂徠結種松社於

此後凋盡。郡人復爲補植。又東麓上達絕頂。夾嶺皆松。名萬松嶺。

朝陽洞。山東北麓獅子石左。廣丈餘。高倍之。深三四丈。日初上。此洞受照。獨先。又葫蘆峯左有朝陰洞。一名千人洞。

海月巖。山北接魁鼻嶺。層層疊出。如飛檐架空中。海上月出。先臨之。故名。而微溜涓滴。隨風飄洒。四時不竭。一名滴珠岩。下有觀音院。又名觀音岩。

天祚岩。在海月岩左。勢若上飛。五代時姚存蟻舟所題識。左右一帶石色紫赤。名紫石岩。山號紫琅。以此。

香爐峯。在天祚岩左。峯巔巨石突起。形若香爐。天陰晦欲雨。雲氣從石罅中噴出。如爐烟縹緲。

仙峴石。在獅子石右。廣二丈許。長倍之。天然古樸。傳爲仙靈試墨處。上多

題刻。漶滅不可辨。

獅子石。在朝陽洞右。高三丈餘。昂首蹲踞。狀若獅子。上刻獅子石三字。

醒石。離立山根數十武。輪廣各二丈餘。可坐十輩。其上游人多飲於此。宋陸子履名之。反陶公所謂醉石也。或曰飲於此者多不醉。宋熙寧癸丑提

點刑獄使晁美叔題名。

神人鞭迹。在山北岩石上。相傳秦始皇鞭痕也。

山市。錢綺樓云。登州有海市。吾通則有山市。嘗遠從福山歸。見空際樓台隱現。彷彿狼峯。真奇觀也。此與軍山霧海二條並不足據。采入姑存一說。

劍山。以形銳得名。高四十四丈。周五百丈。相傳秦始皇淬劍於此。山足石竇齒嶙嶸。築新城。伐其石代甃。遂滅色。四十年始出。苔錢摺而東。石齒益

噴巉削出芙蓉城半壁。

磨劍石。在山東南。相傳祖龍淬劍其上。後墮於江。

雙人峯。二石亭亭如兩人並肩立於天半。在老烏岩。

煉丹臺。高廣尋丈。醫士陳若虛煉丹於此。遇仙在朝陽洞右。又軍山亦有煉丹臺。在真人洞左。縱橫二丈餘。方正如削。爲燕真人煉丹處。詳望仙橋。赤壁。自嶺直下。色赭赤。菩提洞東南峭壁也。遵麓而行。霞光蘸眉睫間。按一統志。江漢間赤壁有五。漢陽漢川黃州嘉魚江夏。惟在江夏者合於史。漢陽府城南臨嶂山。赤壁乃烏林峰也。黃州府城西北漢川門外赤壁乃赤磯山也。屹立江濱。截然如壁。其南有晉時橫江館。若劉備居樊口進兵逆操。遇於赤壁。此赤壁當在樊口上。又操軍初戰不利。引次江北。則此赤

壁當在江南。而蘇東坡謫黃監稅。指黃州赤壁爲赤壁。誤矣。山堂肆考。赤壁在武昌府東南樊口上。東坡之遊。自在黃州。許鶴沙滇行紀程續鈔。黃州起行不數里。遙望對江赤壁。即東坡賦所云。西望夏口。東望武昌者。是也。武昌今武昌縣。非會城。夏口即今漢口也。查楚乘所載赤壁鑿兵。在嘉魚以上。距黃州四百里。非黃州之赤壁。一曰黃州乃赤圻。非赤壁。未知孰是。所謂客有吹洞簫者。綿竹縣武都山道士楊世昌也。字子京。所謂二客。當是郭古二生。郭名邁。字興宗。汾陽人。古名耕道。字無考。新平人。又曰黃州進士。玉局文云。壬戌十二月十九日。東坡生日。置酒赤壁磯上。酒酣。聞笛聲起江上。座中郭古二生頗知音。曰。笛有新意。非俗工也。使人問之。則進士李委。聞東坡生日。作新曲。曰鶴南飛。以獻。呼之使前。則青巾紫裘。腰

笛而已。

天然石梁。僧石明掘土搜出。石脊彎環。下空如梁。或名天斗橋。

淡竹灘。山西南一道。洪流曲抱山麓。萬竿細篠。映帶左右。沙漲後樵採殆盡。

軍山。一名象山。高六十一丈。周六百五十二丈。往往出雲。越王駐軍於此。故名。又云始皇駐軍處也。夫始皇渡浙江。水波惡。從峽中渡。此山下乃揚子江最闊處。何爲駐軍且淬劍乎。國朝康熙初。伐其松樹千餘株。修新城。象鼻岩。山東北。從山椒崩。施直走山麓。長數十丈。若象垂鼻狀。軍山號象山。以此上有古榆彎。下爲象鼻石。一名椒嘴石。又名狼牙石。

四賢祠。祀范文正。胡文定。岳忠武。文忠烈四公。自狼山葵竹山房移此。北

爲水雲窩。

白雲泉。半山上。碧瑩而甘。清冽而寒。識者謂江以北第一泉。今規爲井。在古榆彎南。井上有品泉石。第十六洞天山人題刻。又有茶灶石。在泉側。泉下山岡迴護。岩谷深藏。誠雲嵐窟宅。名臥雲窟。

試劍岩。在山東亂石灣上。一痕如劈。長十數丈。自岩巔直下。俗呼爲洞賓試劍石。

大小山茶灣。山麓自普陀岩東。多山茶。寶珠種也。相傳三青鸞啣其種來。茁於岩壁。陡絕間。昔山麓皆水。花時倒映。水波爲紅。沙漲後。攀取漸盡。百不一存。

躡雲蹬。山東由旭半菴址南上。石級層疊。如躡亂雲中。岩間鑄躡雲蹬三

字。

疊錦巒。山頂東下數十步。怪石纍纍。如星列碁布。紫蘚碧苔。繡錯若錦。桃花峪。種桃花千萬樹。後爲樵斧所盡。在白雲洞前。洞方廣三四丈。凝寒沁肌膚。難久停。每夕將旦時。有白雲飛出。知至者少。右有燕真人洞。真人辟穀所也。左有煉丹臺。離立山麓。高二丈。縱橫略等。方正如削。右有落星岩。瑰確突出。圓如卵。如星之下垂。嘗有飛星墮於此。

張公坡。山東南。輪廣各二丈餘。凌虛架空。俯視無地。衆石翫竄若龍蛇。屈曲莫可名狀。明末總兵張之斗避迹於此。手自鋤闢。邑人義之。名其坡。劉郎路。山北由普陀岩東折而南上。西陟絕頂。其徑僅一線如羊腸。劉闢芳闢之。廣六尺許。行者便之。呼劉郎路。

分水石。在山南麓。查牙突出。橫截道旁。地勢稍高。岩溜瀉時。則左右分流。流東南者味甘淡。流西北者味苦鹹。一名斷水厓。又名伏虎石。

雷轟石。在分水石之左。自山腰至麓峭壁也。叢石纍纍。不一其狀。色紅黃如火。爇。

獅子窟。在山西北普陀岩左。即水觀菴遺址。岩穴陡峭而中凹。左右巉巖凸出。狀若獅蹲。

飲馬池。在山東麓。煉丹臺前。好事者謂祖龍駐軍飲馬於此。

亂石灣。在山東麓。自狼牙石南入真人洞下。衆石淋漓。若鯨翻。若虎伏。若老人倚立。若醉翁僵臥。若鞭之不行。若叱之輒起。圓若柱。尖若笋。長若橋。梁。平若几席。一石一態。都可名狀。

穿風洞。在西南麓獅子窟左數十步。清虛尚曠。靈風肅然。門二。可南入而西出。一傑石門洞。門半開。寬尺餘。才通人行。斜陽照之。如有氣勃勃然。裏外多石磴。可坐可臥。

招鶴崖。劉闕芳從土中搜剔出。夜聞鶴唳。因名。中圓若柱。上平若几。頂廡而登。可坐四五輩。張雲驥山人篆刻有記。

水雲窩。在山東四賢祠後。疊錦巒右。雲牙石上。招鶴崖下。天欲雨。先有雲氣吐出。既而變黓滿山。如驚濤驟湧。滾滾不息。咫尺相視。不見人影。中一巨石側立。鐫水雲窩三大字。旁有屋三楹。繞屋皆叢桂。

畫石。五山皆有。出軍山者爲最。其紋若松竹藤蔓。山水魚鳥狀。似蘸墨成者。

霧海。軍山泄霧成海。猶黃山之有雲海也。李紅橋詩集有霧海歌。

黃泥山。宋時名馬鞍山。以土色易名。高二十三丈。周五百四十六丈。

神人拇迹。適軸山齋西南盡處。多桃花。雨下有脚印石履痕數處。深淺不一。

桃源洞。在大人峰東北麓。高丈餘。深略等。廣三四丈。草木蒙茸。雲翠嵐光。可掬。往時有桃千樹。

大人峯。在翠屏峰下。高六七仞。平地介立。不連岡以成高。不附勢以自遠。翹然名出。若自表具不羣者。望之。使人生嚴憚之心。一名紗帽石。頂峨峨如冠冕者。然又名朝冠石。

諸賢祠。在桃源洞左。山中最幽處。宋提刑薛球太守臧師顏輩遊憩於此。

翠屏峯。在山東北翠屏菴左。嵐岫鞠嶺如列屏嶂。碧蘚蒼苔。縈密蔭翳。雖嚴冬葱鬱之色不減。一名南屏。又名竹院。

馬鞍山。宋時名仙女山。明時名塔山。又名黃泥山。高十二丈。周三百五十五丈。或謂隋煬帝征遼時放馬處。

獅子峯。在放生池左。其西有岡。南有碁石。西下爲釣臺。

碁石。在獅子峯南。高尋丈。長廣略等。相傳有仙子對弈於此。

釣臺。在獅子峯西下。長丈餘。突出山腰。昔江水繞山麓。傳有仙人垂竿於此。

一線天。在山西北麓。一名穿江洞。又名仙女洞。即仙姑洞也。自北側入。直南而出。昔一女子從龍舒來。年七十餘。無顛賴容。食息其中。久之。仙女山

最外時有穴中通。稱仙女山。以此東有望姑峯。

鍾秀山。土山也。郡城北沔下。不可以門。距城三里。地棄而不治。積潦盤據。榛莽交翳。明興以來。生齒寔繁。土地亦闢。今則田園繡錯。烟火彌望。槐榆夾道。行者不絕。士大夫喜爲堪輿之說者。謂風氣不聚。必築土山。與五山相對峙。俾背腹交蔭。形制始備。明嘉靖中。州守高啓新。買田區畫。未久。調去。迄隆慶己巳。鄭守舜臣。毅然成之。中爲主山。旁四小山。竹樹陰森。樓閣軒敞。勝概甲於城北。登之。則城中廬屋如魚鱗。城南五山。遠與相對。若賓主相見。各極其態。而莫能相下也。據陳梧岡記。

孤山。在泰興縣東南七十里。南枕大江。歸然一峯。約高百仞。有伏龍寺。產巨竹。伐竹者必先祀伏虎禪師像。禱雨輒應。今徙江中數十里。在靖江界。

筆架山。在泰興學署後。教諭荆子邁築。上有光霽臺。前有紺碧池。種蓮其中。堂曰君子堂。後有橋曰書帶橋。

蠟山。如皋縣掘港場之苴上。一名土山。土人取車螯棄殼和土成山。高十餘丈。一峯高聳。望之若浮樹。孤嶼出沒雲濤中。

摩訶山。在如皋縣南一百二十里大江中。一名段山。又名蝦蟆山。上有大聖祠。廣輿記相傳山多異蛇。泗州僧伽過此。蛇爲分道。故立祠。嘉靖庚申志。縣以摩訶爲屏蔽。舊志山初連北岸。距石莊二十里。自永樂後。田沒人。江嘉靖間又日益激蓄。浮螺一嶼。已距厓六十里矣。山下沙洲。爲江陰靖江二縣人佔據。已連蘇州之常熟。反與如皋隔絕。實則縣兩界也。

碧霞山。如皋縣城內。上有碧霞元君祠。曲水長隄。左右環映。幽林別墅。迴隔市營。風月佳辰。雅宜延眺。

揚子江。揚州府志。揚子江自黃天蕩趨泰通入海。方輿記要。自瓜州而東至泰興縣西周家橋。縣志。自周家橋至通州南三十里之狼山港。與蘇州昭文縣北四十里之福山港相對。江面闊百里。州志。江經泰興西南。逕靖江東南。過如皋西南。又東至通州海門鄉入於海。

廣陵濤。昔廣陵轄十州邑。通州爲門戶。江自京口來。東抵通會於海。俗指邗關一勺水爲廣陵濤。是泉也。非濤也。觀濤賦云。南望胥山。胥山者。狼山也。昔人云。匣裏夜光滄海月。賦中秋色廣陵濤。狼山觀濤之證也。枚生七發狀濤曰。乘意於南山。望通於東海。江水逆流。海水上升。又狼山八月旣望。觀濤之證也。由此考之。控江之尾。扼海之喉。廣陵屬通無疑。李草亭辨